

Fasnacht 2008

**Vereinigte Kleinbasler
Alti Garde**



Sujet: O sole mio !

Friidlig zieht am Nordpool oobe
e glainen Yysbäär syyni Runde;
Är kaa döört nümm lang ummetoobe
und gnisst die letschte kalte Stunde.
Aer isch no s ainzig Exemplaar
wo druurig ummelungeret;
Syy Mammen isch, s isch unfassbaar,
vor Wuche scho verhungeret.
Jetz hett däa häärzig Syydebolle
halt effektyyv nur no s Besträäbe:
Im Paggys uff er e kalte Scholle
so lang wie mööglig z überlääbe.

D Chance stöön für ihn nit guet
wenn miir so wyter mache;
Är frogt sich drum in groosser Wuet
ob d Mensche nie verwache ?
S verregge d Meer, d Luft wird zerstöört
und goodet wird dr Wald;
Und wenn me nit uff d Waarnig höört
verlaaft syy Yys au bald.

*...und s Yys vom Bäär, däm glaine, stolze
isch bereits e bitzli gschmolze*

Derbyy gitt s wältwyt Konferänze
in Bali und in Kyoto;
nur zieht me kaini Konsequänze,
denn s goot döört noon em Motto,
dass *anderi* zeerscht solle spaare,
vor allem zeerscht die Inder
und schliesslig au d Chinese-Schaare
und vo den Inder d Kinder...

D Lüüt fliegen yy per Düüse-Jet,
S dänggt niemer an Planeet;
Si laabe sich an Fescht-Banggett
...vo Umwältchutz ? – Kai Reed !

In Bali wird denn diskutiert
im klima-gschützte Saal;
S wird gschlemmt und gsürpffet und diniert.
S Ergääbnis ? - Minimaal !
S hänn alli zwoor die glyychy Mainig:
S wäär höggschti Zyt zem handle,
Wil s Klimaa – und me isch sich ainig –
sich Daag für Daag duet wandle.

*...doch am Nordpool zimlig gschwind
schmilzt s Yys vo unserem Bäärekind...*

Dr Bush, dr Boss vo USA,
Isch s grööschte Risikoo;
Nur isch dä Maa z Amerikaa
vyyl z blööd für das z verstoo.
Jetz wünscht me sich, s haig bald en Änd,
Doch d Hoffnig isch rächt kiehn,
denn au bim näggschte Presidänt
wird s Wysse Huus kuum grien.

Doch halt emool. Sinn miir perfäggtter ?
Isch Gryttig denn erlaubt ?
Und handle miir emänd korräggtter ?
Säälilig isch, wäär s glaubt !

Dien miir nit au – nur zem Vergniege –
e Mini-Uusflug mache
und "numme gschwind" in Süüde fliege
per Jet, mit dausig "Sache" ??

*...doch s Yysfäld, wo dr Bäär druff sitzt,
schwitzt und schwitzt und schwitzt und schwitzt..*

Miir schmaisse Drägg in d Atmosphääre
(für daas hänn miir Talänt);
Und d Art, wie miir uns dien ernääre
isch au rächt dekadänt:
D Riebli dien mir z Spanie hoole
S Wintergmies wänn miir im Mai;
Die dummi Gans, die kunnt uus Poole
Und d Spaarse kömme uus Hawaii.
Kiwis uus em Färnen Oschte,
Uus Costa Rica d Ananas;
Uns isch es Wurscht, was das duet koschte,
S wichtigscht: S macht em Gaume Spass.
Denn hoole miir per Dyyselschlitte
bim näggschte Begg am Egge:
Drei Schwööbli, zwai Studänteschnitte
und löhn uns die lo schmegge.
Per Helikopter uff dr Gipfel
per Ski im Diefschnee dur d Natuur,
verbyy an fyynstaub-gschwechte Wipfel
Umwälttächnisch: "Schwachsinn puur".

*...und däm Bäärli uff em Yys
goht s unterdesse wirgglig myys*

Syt d Mensche sich e Dryybhuus baue,
Wird s Joor für Joor noo wermer;
Und wil MIR d Umwält dien versaue
die Arme noo vyyl ermer.
Kai Stroom wird gspaat, kai Energyy
in Wärggstett und in Beize
und – syg s privaat, syg s Industryy –
mir dien au vyyl z fescht heize.
Maischterhaft dien miir s verdränge
S isch nit sehr yyfallsryych;
Für UNS wird d Luft woorschyynts no länge,
doch d Zuekumpft isch uns glyych.

Stimmt nit ! Jetz simmer alarmiert.
Mir wänn jetz besser wärde;
Dr Drägg wird sofort reduziert
im Sinn vo uns'rer Aerde.

*S wäär höggschti Zyt...ah nai, s isch z spoot
Denn uns'ren Yysbäär isch jetz doot...*

Ohni Schaade für s Klima erwärmt uns d Ladäärne-
Uusstellig uff em Münschterplatz und d Waagen- und
Requisite-Uusstellig bi dr Kasäärne. Bewundere kaa me
die Kunschtwärgg vom Määntig znacht bis am Mittwoch
demoorge. Döört kaa men au alli Zeedel und
Schnitzelbängg, d Blaggedde und dr Rädäbäng kaufe.
